

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U VISOKOM  
Broj: 41 0 K 099649 24 K  
Visoko, 16.05.2024. godine

## U IME FEDERACIJE BOSNE I HERCEGOVINE

Općinski sud u Visokom, po sudiji Avdiji Avdić uz sudjelovanje zapisničara Sejdić Džemile, u krivičnom predmetu protiv optuženog J.S., zbog krivičnog djela : neovlaštena proizvodnja i stavljanje u promet opojnih droga iz člana 238. stav 1. KZ F BiH, rješavajući po optužnici Kantonalnog tužilaštva-tužiteljstva Zeničko-dobojskog kantona broj T04 0 KT 0054883 23 od 27.10.2023.godine, nakon zaključenog glavnog javnog pretresa, održanog dana 16 05.2023. godine u prisustvu Kantonalnog tužitelja Mustafić Mesuda, optuženog J.S. i branitelja Močević Azre, uposlenik Kantonalni zavod za pravnu pomoć ZE DO kantona, na pretresu za objavljivanje presude, u prisustvu kantonalnog tužitelja, optuženog i branitelja, dana 16.05.2024.godine, donio je i javno objavio :

## P R E S U D U

OPTUŽENI: J.S., zvani „S.“, sin M. i majke A. rođene T., rođen ... u V., gdje je i nastanjen na adresi P. broj ..., pismen, sa završenom srednjom školom, po zanimanju auto-mehaničar, oženjen, otac petero mladb. djece, nezaposlen, po nacionalnosti Bošnjak, državljanin BiH, JMB: ..., neosuđivan,

## K R I V I J E

što je,

dana 24.06.2020. godine, u V., suprotno odredbama člana 4. stav 1., 2, 3. i 5., a u vezi sa odredbom člana 19. Zakona o sprečavanju i suzbijanju zloupotrebe opojnih droga, u putničkom motornom vozilu marke „Audi“ registarskih oznaka ... kojim je upravljao, licu B.E. prodao opojnu drogu „Marihuanu“ upakovanu u alu-foliju neto mase 2,268 grama za iznos od 30,00 KM, iako je znao i bio svjestan da je prodaja opojne droge zakonom zabranjena, što je i htio, u pretincu ispod suvozačevog mjesta radi dalje prodaje neovlašteno posjedovao opojnu drogu „Cannabis“ koja sadrži psihotropnu supstancu tetrahidrokanabinol (THC) upakovanu u prozirnu pvc vrećicu u kojoj se nalazilo devet alu-folijskih paketića ukupne neto mase 8,719 grama, iako je bio svjestan da je posjedovanje opojne droge radi dalje prodaje zakonom zabranjeno, što je i htio, te u porodičnoj kući u mjestu P., radi dalje prodaje, neovlašteno posjedovao opojnu drogu „Cannabis“ koja sadrži psihotropnu supstancu tetrahidrokanabinol (THC) upakovanu u pvc paketić neto mase 30,849 grama, iako je bio svjestan da je posjedovanje opojne droge radi dalje prodaje zakonom zabranjeno, što je i htio, koja droga je pod rednim brojem 13 Liste opojnih droga i rednim brojem 26 Liste psihotropnih tvari iz tablice I „Zabranjene tvari i biljke“ proglašena kao takvom, te jednu digitalnu vagu, što je pronađeno prilikom pretresa u kući stanovanja osumnjičenog na osnovu usmene naredbe za pretresanje Općinskog suda u Visokom od 24.06.2020. godine,

dakle, drugom prodao opojnu drogu i neovlašteno radi dalje prodaje posjedovao kod sebe opojnu drogu,

čime je učinio krivično neovlaštena proizvodnja i stavljanje u promet opojnih droga iz člana 238. stav 1. KZ F BiH.

Pa sud optuženom na osnovu istog zakonskog propisa: te na osnovu članova: 42., 49. i 62. KZ FBiH, i z r i č e

#### USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 1(jedne)godine a koja se neće izvršiti ako optuženi za vrijeme od 3(tri)godine ne počini novo krivično djelo.

Na osnovu člana 78. stav 1. KZ F BiH i člana 239. stav 4. KZ F BiH od optuženog J.S. se oduzima ostatak opojne droge „Cannabis“ preostala nakon vještačenja neto mase 30,812 grama i 8,466 grama koja se nalazi deponovana u Kantonalnom tužiteljstvu ZDK, koja će se uništiti pred Povjerenstvom za uništenje oduzetih opojnih droga, psihotropnih tvari, biljaka iz kojih se mogu dobiti opojne droge i prekursora posredstvom MUP-a ZDK Zenica u čijem se posjedu i nalaze.

Na osnovu člana 202. stav 4. ZKP FBiH, optuženi se oslobađa plaćanja troškova krivičnog postupka i isti padaju na teret sredstava suda.

#### Obrazloženje

Kantonalno tužilaštvo Zeničko-dobojskog kantona (u daljem tekstu KT ZDK), optužnicom broj T04 0 KT 0054883 23 od 27.10.2023.godine , optužilo je J.S., zbog krivičnog djela neovlaštena proizvodnja i stavljanje u promet opojnih droga iz člana 238. stav 1. Krivičnog zakona Federacije Bosne i Hercegovine (Službene novine Federacije BiH br. 36/03, 37/03, 21/04, 69/04, 18/05, 42/10, 42/11, 59/14, 76/14, 46/16 i 75/17), (dalje u tekstu KZ FBiH).

Optužnica je potvrđena od strane sudije za prethodno saslušanje ovog suda dana: 31.10.2023.godine. Dana 24.01.2024. godine na ročištu o izjašnjenju o krivnji, optuženi J.S. je izjavio da nije kriv za krivično djelo koje mu se stavlja na teret.

Na glavnom pretresu održanom 16.05.2024.godine, prije izvođenja dokaza, optuženi J.S. je priznao krivnju za krivično djelo neovlaštena proizvodnja i stavljanje u promet opojnih droga iz člana 238. stav 1. KZ F BiH, čije priznanje je prema ocjeni ovog suda u saglasnosti sa dokazima u koje je sud izvršio uvid i to: zapisnik o saslušanju svjedoka B.E. PS Visoko broj: 08-02-09/1-917/23 od 03.10.2023. godine, zapisnik o saslušanju svjedoka J.F. PS Visoko broj: 08-02-09/1-177/20 od 26.06.2020. godine, Nalaz ispitivanja NN materije broj 09-18/2-03-5-1077 od 28.10.2020. godine, službenu zabilješku PS Visoko broj: 08-02-09/1-178/20 od 24.06.2020. godine, naredbu za pretresanje PS Visoko broj: 08-02-09/1-33/20 od 24.06.2020. godine, zapisnik o izvršenoj radnji privremenog oduzimanja predmeta i popisu privremeno oduzetih predmeta PS Visoko broj: 08-02-09/1-67-1/20 od 24.06.2020. godine, potvrdu o privremenom oduzimanju predmeta PS Visoko broj: 08-02-09/1-67/20 od 24.06.2020. godine na ime J.S., zapisnik o pretresanju stana, drugih prostorija i pokretnih stvari PS Visoko broj: 08-02-09/1-33-1/20 od 24.06.2020. godine, potvrdu o privremenom oduzimanju predmeta PS Visoko broj: 08-02-09/1-68/20 od 24.06.2020. godine na ime J.S., odobrenje KT ZDK broj: T04 0 KTA 0042332 20 od 02.07.2020. godine, zapisnik o otvaranju i pregledu privremeno oduzetih predmeta i dokumentacije PS Visoko broj: 08-02-09/1-136,137-1/20 od 23.07.2020. godine, naredba za vještačenje KT ZDK broj: T04 0 KTA 0042332 20 od 02.07.2020. godine,

fotodokumentaciju PS Visoko broj: 08-02-09/1-136/20 od 24.06.2020. godine, fotodokumentaciju PS Visoko broj: 08-02-09/1-137/20 od 24.06.2020. godine, fotodokumentaciju PS Visoko broj: 08-02-09/1-136,137-1/20 od 23.07.2020. godine, pravosnažnu presudu Općinskog suda u Visokom broj: 41 0 K 084619 21 K od 15.04.2021. godine i izvod iz kaznene evidencije za osumnjičenog J.S. PS Visoko od 31.07.2023. godine.

U prilog olakšavajućih okolnosti za optuženog odbrana uložila u spis dokaze i to: Rodne listove za 5 mladb.djece Izvod iz MKR.

-Kućna lista Služba za opću upravu zajedničke poslove Visoko od 03.05.2024.godine kojom se dokazuje da moj branjenik živi sedmočlano domaćinstvo koje čini njegova supruga i 5 mladb.djece

-Uvjerenje JU Službe za za zapošljavanje ZDK od 23.04.2024.godine iz koje se može utvrditi da je moj branjenik nezaposlena osoba

- Uvjerenje JU Službe za za zapošljavanje ZDK od 23.04.2024.godine za suprugu mog branjenika iz koje se može utvrditi da je ista nezaposlena.

-Rješenje Službe za finansije, privredu, i ekonomski razvoj grada Visoko od 19.12.2023.godine iz kog se može utvrditi da brat mog branjenika J.Z. da ima registrovanu firmu tradicionalni obrt pekara Jamaković

Kantonalni tužilac u završnoj riječi izjavio na današnjem glavnom pretresu optuženi je promijenio svoju izjavu o krivnji, i priznao izvršenje krivičnog djela koje mu se stavlja na teret.

Dokazi koji su danas prezentirani sudu također nesumnjivo potvrđuju kako je optuženi počinio ovo krivično djelo iz čl.238 KZ FBiH, pa predlažem da ga sud oglasi kivim i osudi po zakonu.

Branitelj u završnoj riječi izjavio: Obzirom da je moj branjenik priznao krivnju predlažem sudu da priznanje cijeni kao olakšavajuću okolnost na njegovoj strani. Prilikom odabira vrste i visine krivično pravne sankcije. Moj branjenik će u svom završnom izlaganju istaknuti razloge zbog kojih je ovo krivično djelo počinio, a i u tim razlozima će se na neki način moći od strane suda utvrditi olakšavajuće okolnosti i to daje u to vrijeme, u vrijeme izvršenja krivičnog djela imao troje djece i ženu trudnu koja je očekivala dijete. Bilo je doba korone, kada je on ostao bez posla. Na sva moguća vrata je kucao da bi našao bilo kakav posao za nadnicu da bi mogao prehraniti porodicu, ali u tom periodu je važio policijski sat nije dozvoljeno kretanje, tako daje traženje posla bilo uzaludno. Moj branjenik nije bio nikad konzument opojnih sredstava, ja ne tražim opravdanje za njegovo postupanje za ovo što iznosim, ali ističem zato što su bitni za ocjenu same ličnosti mog branjenika. Od olakšavajućih okolnosti predlažem sudu da cijeni da je on otac petoro mladb.djece, da za dnevnicu radi kod svog brata Z. u pekari koji ima registrovano zanimanje, a brat mu je najavio da će ga uskoro i prijaviti tako da taj rad više neće biti na crno.

Predlažem sudu da kao olakšavajuću okolnost na strani mog branjenika također cijeni i loše zdravstveno stanje njegove supruge koja i u narednom periodu treba da se podvrgne sljedećoj operaciji. Moj branjenik se kaje zbog učinjenog krivičnog djela i obećava da nešto slično neće učiniti. Ja predlažem sudu da za učinjeno krivično djelo izrekne uvjetnu osudu pa čak i sa dužim rokom provjere, jer smatram da bi se istom postigla kako specijalna tako i generalna prevencija. Zbog loših imovinskih prilika predlažem sudu da mog branjenika oslobodi plaćanja troškova krivičnog postupka.

Optuženi u završnoj riječi izjavio da se pridružuje u cijelosti završnom izlaganju svog branioca, da se kajete obećao da sigurno više neće nikad u životu ni pomisliti da nešto tako uradi.

Sud je ovo priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u suglasnosti sa materijalnim dokazima, naprijed navedenim, u koje je sud izvršio uvid, na osnovu čega van svake sumnje proističe da je optuženi u svojim radnjama ostvario sva bitna obilježja bića krivičnog djela koje mu se stavlja na teret, odnosno krivično djelo neovlaštena proizvodnja i stavljanje u promet opojnih droga iz člana 238. stav 1.. KZ F BiH.

Po ocjeni suda optuženi je navedeno predmetno krivično djelo učinio sa direktnim umišljajem jer je bio svjestan svog djela i htio njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predočenim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela neovlaštena proizvodnja i stavljanje u promet opojnih droga iz člana 238. stav 1.KZ F BiH.

Prilikom izricanja krivično pravne sankcije sud je cijenio optuženom kao olakšavajuće okolnosti činjenicu da je priznao izvršenje krivičnog djela koje mu se stavlja na teret, čime su u mnogome doprinio utvrđivanju činjeničnog stanja i skraćanju krivičnog postupka, da nije ranije osuđivan, da izdržava petoro malodobne djece i bolesnu suprugu, iskreno kajanje kao i protek vremena od dana izvršenja krivičnog djela. Dok otežavajućih okolnosti sud nije našao. Cijeneći utvrđene okolnosti na strani optuženog, sud je optuženom J.S. za navedeno krivično djelo utvrdio kaznu zatvora u trajanju od 1 (jedne) godine, koja kazna se neće izvršiti ako optuženi u roku od 3 (tri) godine ne počini novo krivično djelo. Po mišljenju ovog suda izrečena sankcija srazmjerna je stepenu odgovornosti optuženog i težini počinjenog krivičnog djela koje mu se stavlja na teret, te će se istom postići svrha kažnjavanja, kako sa aspekta generalne, tako i specijalne prevencije predviđena članom 42. KZ FBiH.

Na osnovu čl.202 stav 4 ZKP FBiH sud je optuženog oslobodio plaćanja troškova krivičnog postupka i isti padaju na teret budžetskih sredstava suda, jer bi plaćanjem troškova bila dovedena u pitanje njegova materijalna egzistencija.

Sudija  
Avdija Avdić

#### PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.